

**GRAD NOVI PAZAR**  
**SKUPŠTINA GRADA**  
**Odbornička grupa SDA Sandžaka**

Novi Pazar

9. februar 2022. godine

**P R E D S J E D N I K U**  
**SKUPŠTINE GRADA NOVOG PAZARA**

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O POKRETANJU INICIJATIVE O OSNIVANJU PRIVREDNOG SUDA U NOVOM PAZARU**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja će se održati 10. februara 2022. godine.

Ovlašteni predstavnik odborničke grupe SDA Sandžaka po ovoj tački dnevnog reda je zamjenik predsjednika odborničke grupe mr. **Emir Aščerić**.

**Predsjednik odborničke grupe**

Ahmedin Škrijelj

## **PRIJEDLOG**

Na osnovu člana 79. Zakona o lokalnoj samoupravi („Sl. glasnik RS“, br. 129/2007, 83/2014 - dr. zakon, 101/2016 - dr. zakon i 47/2018), člana 17, člana 46, člana 132. i člana 135. Statuta grada Novog Pazara („Službeni list grada Novog Pazara“ br. 16/19) člana 137. i člana 138. Poslovnika Skupštine grada Novog Pazara („Službeni list grada Novog Pazara“, br. 6/19), Skupština grada Novog Pazara, na sjednici održanoj \_\_\_\_\_ godine, donosi

### **ODLUKU O POKRETANJU INICIJATIVE ZA OSNIVANJE PRIVREDNOG SUDA U NOVOM PAZARU**

#### **Član 1.**

Skupština grada Novog Pazara pokreće inicijativu za osnivanje Privrednog suda u Novom Pazaru.

#### **Član 2.**

Skupština grada Novog Pazara traži od Vlade Republike Srbije da usvoji izmjene i dopune Zakona o sjedištima i područjima sudova i javnih tužilaštava (u daljem tekstu: Zakon), u cilju osnivanja Privrednog suda za u Novom Pazaru, i da iste ostavi Narodnoj skupštini na razmatranje i donošenje.

#### **Član 3.**

Izmjene i dopune Zakona iz člana 2. ove Odluke odnose se na član 5. Zakona, kojim bi se uveo Privredni sud u Novom Pazaru, za teritoriju opština Nova Varoš, Priboj, Prijepolje, Sjenica i Tutin i za grad Novi Pazar.

#### **Član 4.**

Ovu odluku dostaviti Vladi Republike Srbije.

#### **Član 5.**

Ovu odluku objaviti u „Službenom listu grada Novog Pazara“.

### **SKUPŠTINA GRADA NOVOG PAZARA**

Broj: \_\_\_\_\_

U Novom Pazaru, \_\_\_\_\_ godine

**PREDSJEDNICA**  
Dr. Anela Šemsović

## **O B R A Z L O Ž E N J E**

### **I – Pravni osnov za donošenje odluke**

Članom 32. stav 1. Tačka 18. i 20. Zakona o lokalnoj samoupravi propisano je da Skupština opštine (jedinica lokalne samouprave) daje mišljenje o zakonima kojima se uređuju pitanja od interesa za lokalnu samoupravu i da obavlja i druge poslove utvrđene zakonom i statutom.

Članom 70. stav 1. i 2. Zakona o lokalnoj samoupravi propisano je, između ostalog, da organi i službe jedinice lokalne samouprave u vršenju svojih nadležnosti daju organima Republike inicijative za uređivanje odnosa od značaja za lokalnu samoupravu, kao i da podnose predstavke i daju prijedloge u pogledu postupanja organa Republike.

Članom 28. stav 1. Zakona o lokalnoj samoupravi propisano je da je Skupština opštine najviši organ opštine koji vrši osnovne funkcije lokalne vlasti, utvrđene Ustavom, zakonom i statutom.

Statutom grada Novog Pazara propisano je da Skupština grada Novog Pazara daje mišljenje o zakonima kojima se uređuju pitanja od interesa za lokalnu samoupravu, da obavlja i druge poslove utvrđene zakonom i statutom (član 46. stav 1. tačka 60. i 77.) te da u vršenju poslova iz svoje nadležnosti organi Grada između ostalog donose i odluke (član 147.).

Članom 137. Poslovnika Skupštine grada Novog Pazara propisano je da Skupština donosi: odluku, program, plan, rješenje, zaključak, poslovnik, deklaraciju, rezoluciju, preporuku i druge akte u skladu sa zakonom, Statutom i Poslovnikom.

### **II – Razlozi i cilj donošenja odluke**

Postojećim Zakonom o sjedištima i područjima sudova i javnih tužilaštava, Novi Pazar ima sudsku jedinicu Privrednog suda u Kraljevu, za teritoriju opština Sjenica i Tutin i grad Novi Pazar.

Grad Novi Pazar ima preko 120.000 stanovnika i više od 5.000 registrovanih privrednih subjekata, te građani ovog grada, odnosno privrednici imaju potrebu za bližim sudom od Kraljeva. Novi Pazar je centar regije Sandžak, kojoj gravitira još 5 opština – Tutin, Sjenica, Prijepolje, Priboj i Nova Varoš, koje, zajedno sa gradom Novim Pazarom imaju registrovanih preko 12.000 privrednih subjekata.

Kao centar ove regije, Novi Pazar, iz praktičnih razloga, zaslužuje da ima Privredni sud, odnosno da sudska jedinica preraste u Privredni sud sa sjedištem u Novom Pazaru.

Privredni sud u Kraljevu, prema postojećim propisima, obuhvata teritoriju opština Aleksandrovac, Brus, Varvarin, Vrnjačka Banja, Raška, Sjenica, Trstenik, Tutin i Čičevac i za gradove Kraljevo, Kruševac i Novi Pazar. Osnivanjem suda u Novom Pazaru, poslovi suda u Kraljevu bi se rasteretili, te bi rad oba suda bio efikasniji.

### **III – Objašnjenje pojedinačnih rješenja propisanih ovom odlukom:**

Član 1: Utvrđen je predmet odluke.

Član 2: Propisan je način, odnosno postupak, realizacije odluke te je određen državni organ od koga se traži preduzimanje mjera u cilju realizacije utvrđene ovom odlukom.

Član 3: Utvrđene su konkretne izmjene i dopune Zakona o sjedištima i područjima sudova i javnih tužilaštava, a koje se odnose na osnivanje Privrednog suda u Novom Pazaru, sa obuhvatom teritorija lokalnih samouprava.

Član 4: Propisana je obaveza dostavljanja ove odluke Vladi Republike Srbije.

Član 5: Propisana je obaveza objavljivanja u „Službenom listu grada Novog Pazara“.

### **IV – Finansijska sredstva za sprovođenje ove odluke nisu potrebna.**